

Tafsiira Suuratu Ar-Ruum-Kutaa 7

Description

Mallattooleen gara Rabbii olta'aa akeekan samii fi dachii keessa guutanii jiru. Uumamni samii fi dachiitu mallattoolee gara Rabbii olta'aa akeekan keessaa tokkoodha. Namni mallattoolee kanniinitti yoo xinxalle: Jiraachu Rabbii olta'aa ni amana, sifaata (amaloota) Rabbii kan akka beekumsa, dandeetti, ogummaa, rahmataa fi kanneen biroo ni hubata. Kanaafu, kuni Khaaliqa olta'aa isa uumee fi too'atuuf akka ajajamu isa taasisa.

وَمِنْ أَيْثِنِهِ خَلْقُ السَّمَاوَاتِ وَالْأَرْضِ وَأَخْيَلَفُ الْسِنَّتِ كُمْ
وَالْوَزْنُ كُمْ إِنَّ فِي ذَلِكَ لَآيَاتٍ لِلْعَالَمِينَ

(٢٢)

“Ammas, mallattoolee Isaa irraa uumama samiiwwanii fi dachii, garaagarummaa afaanotaa keessaniitii fi bifa keessaniiti. Dhugumatti, kana keessa beektotaaf mallattoolee jira.” Suuratu Ar-Ruum 30:22

Kana jechuun, mallattoolee dandeettin Isaa guutuu ta'uu agarsiisan keessaa: samii torban uumuu fi utubaa tokko malee olkaasu, bal'innaa fi diririinna ishii waliin dachii uumudha. Akkasumas, lugaa fi bifni keessan gargar ta'uudha.^[1] Sabni addunyaa hundu lugaa mataa ofii qaba. Lugaaleen hundu garagara. Fkn, Ingiliffaa fi Arabiffi garagara. Lugaaleen akkanatti gargar ta'uun mallatoo Isaa irraayyi. Akkasumas, bifti namootaa garagara. Gariin adii, gariin diimaa, gariin gurraacha, gariin magaala. Ilmaan nاماا hunduu hundee tokko irraa bahan. Innis Aadami. Kanaafu, eenyutu akkanatti lugaalee fi bifa isaanii gargar godhee?

Cophni bishaan saalaa bifa fedhe fudhachuu danda'aa? Abbaa fi haati bifa barbaadan irratti daa'ima isaanii gochuu danda'u? Kanaafu, kanakkana hojjatu jiraachu qaba. Kanakkana hojjatu Rabbii olta'aa akka ta'e ni beekkama. Kuni ragaa cimaa gara Isaa akeekudha.

Dhugumatti namoota beekumsa qaban hundaaf kana keessa barnootaa fi ragaaleetu jira. Samii fi dachii garmalee gurguddatan kanniin Kan uumee, lugaa fi bifa namootaa gargar Kan godhe akkuma duraan turanitti du'aan booda namoota deebisuun homaa Isatti akka hin ulfaanne warri beekumsa qaban ni hubatu.

وَمِنْ عَائِتِهِ مَنَامُكُمْ بِاللَّيْلِ وَالنَّهَارِ وَأَبْيَغَاؤُكُمْ مِنْ فَضْلِهِ إِنَّ
فِي ذَلِكَ لَآيَاتٍ لِقَوْمٍ يَسْمَعُونَ



“Ammas, mallattoolee Isaa keessaa halkanii fi guyyaa rafuu keessanii fi tola Isaa irraa barbaadachuu keessani. Dhugumatti, kana keessa namoota dhagayaniif mallattooleetu jira.”
Suuratu Ar-Ruum 30:23

Dandeetti fi rahmata Rabbii wantoota agarsiisan keessaa: halkan ykn guyyaa keessatti hirriba isiniif boqonnaa taasise. Hirriba keessatti boqonnaan ni argama, dadhabbiin immoo ni deema. Guyyaa immoo rizqii barbaadachuuf akka faffacaatan isiniif godhe. Dhugumatti, namoota gorsa Rabbii dhagayanii ittiin gorfamaniif kana keessa mallattoolee dandeettin Rabbii guutuu ta’uu fi fedhiin Isaa hojii irra akka oolu agarsiisantu jira.[\[2\]](#)

Hirribni fedhii namaatiin hin ta’u. Wanti guddaan namni hojjachuun danda’u sababoota hirribni ittiin dhufu hojjachuudha. Garuu hanga rafutti qaama isaa keessaa ruuhi baasun ykn hanga dammaquuti qaama isaatti ruuhi deebisuun waan inni hin dandeenyedha. Kana irra, Rabbitu kana hojjata. Kanaafi, yeroo garii namni hirriba barbaaduun firaasha irra ciisa. rafuuf garmalee carraaqaa. Ergasii rafuu hin danda’u. Yeroo garii immoo osoo inni qophii hin ta’in hirribni isa fudhata. Kanaafu Hirribni fedhii Rabbiit in ta’a.
[\[3\]](#)

(Halkaniin rafuu fi guyyaa rizqii barbaadachuuf bittinaa’un wanta du’aan booda kaafama agarsiisuudha. Halkaniin rafuun ragaa du’ a agarsiisuudha. Guyyaa ka’anii hojjachuun immoo ragaa du’aan booda kaafama agarsiisuudha.[\[4\]](#) Akkuma namni rafee hiribaa dammaquu, namni du’es guyyaa Qiyaamaa bakka awwaalame ni kaafama.)

Hirribni mallattoo Rabbii irraayyi. Ibsi kanaas: namni miira (feeling) qabu kuni yommuu rafu miira isaa ni dhaba. Yeroo hin rafin ruuhin haala guutuu ta’en qaaman tan wal qabatheedha. Yommuu rafuu immoo qaama irraa addaan bahiinsi wayii ni argama. Kanaafi, Rabbiin olta’aan hirriba wafaata (du’ a) jechuun waame. Garuu kuni du’ a ruuhin qaama irraa haala guutuu ta’een addaan baatu miti. Haa ta’uu malee, addaan bahuu cinaa qaama irraa addaan baati. Addaan bahuun cinaan jireenyi waliin hafu kuni mallattoolee Rabbii irraayyi. Rabbiin malee eenyullee kana hojjachuun hin danda’u. Akkasumas, hayyama Rabbiit in malee eenyullee qaamatti ruuhi deebisuu hin danda’u.[\[5\]](#)

﴿وَمِنْ عَائِتِهِ يُرِيكُمُ الْبَرَقَ حَوْفًا وَطَمَعًا وَيُنَزِّلُ مِنَ السَّمَاءِ مَاءً
فَيُحِيِّ بِهِ الْأَرْضَ بَعْدَ مَوْتِهَا إِنَّ فِي ذَلِكَ لَآيَاتٍ لِقَوْمٍ يَعْقِلُونَ﴾

“Ammas mallattoolee Isaa keessaa hangaasu sodaa fi kajeellaa [fidu] isinitti agarsiisa, bishaan samii irraa buusun du’ a ishiitiin booda dachii ittiin jiraachisa. Dhugumatti namoota aqlii qabaniif kana keessa mallattooletu jira.”

Suuratu Ar-Ruum 30:24

Wantoota dandeetti Isaa agarsiisan keessaa tokko: hangaasu isinitti agarsiisuudha. Hangaasuun hojii Rabbiin olta'aan qofti hojjatuudha. Sababa hangaasutiin bakakkaan bu'uu waan danda'uuf nama sodaachisa. Ammas, sababa kanaan roobni roobu waan danda'uuf namoota roobatti hajaman hangaasun ni kajeelchifti.[\[6\]](#) Namoonni yommuu hangaasu argan ykn dhagayan takkaa bakakkaan bu'uu dandeessi jechuun sodaatu, takkaa immoo roobni ni rooba jechuun kajeelu.

“bishaan samii irraa buusun du'a ishiitiin booda dachii ittiin jiraachisa.” kana jechuun dachiin erga gogdee booda bishaan duumessa irraa itti roobsun ishii jiraachisa. Dachii jiraachisuu jechuun biqiltoota biqilchuudha. Dachiin duraan gogduu turtee fi biqiltuu homaatu ofirraa hin qabne, yommuu rooba itti roobsu, biqiltoota magariisaa fi babbareedoo biqilchiti. Kana keessa mallatoo fi ragaa ifaa du'aan booda kaafamu agarsiisutu jira. Kanaafi ni jedha: **“Dhugumatti namoota aqlii qabaniif kana keessa mallattoletu jira.”**

Aqliin gosa lamatu jira: aqlii waa hubachuu fi aqlii qajeelinnaa.

Aqliin qajeelinnaa- lubbuu ofii waan badaa irraa qabuu fi wanta itti ajajaman hojjachuudha. Aqliin aqlii kan jedhameef abbicha wanta isa miidhu irraa waan isa qabuufi.[\[7\]](#)

Mallatolee Tokkichumma, dandeetti, beekumsa, rahmataa fi ogummaa Rabbii olta'aa agarsiisan keessaa:

**Samiiw
wanii fi
dachii
uumuu**

**Lugaalee
fi bifti
namaa
garagar
ta'uu**

Halkan
ykn
guyyaa
rafuu,
rizqii
barbaadac
huu

**Sodaachis
uu fi
kajeelchis
uuf
hangaa
namatti
agarsiisu.**

**Samii
irraa
bishaan
buusun
dachii
duute
ittiin
jiraachisu**

[1] Tafsiir Muyassar-406 [2] Madda olii, Tafsiir Xabarii-18/480 [3] Tafsiir Qur'aanil Kariim-Suuratu Ar-Ruum, Ibn Useymiin- 124-125 [4] Tafsiir Qurxubii-16/413 [5] Madda olii-fuula 126-127 [6] Tafsiir Muyassar-406, Ma'aariju Tafakkuri wa daqaa'iqu tadabburi-15/147 [7] Tafsiir Qur'aanil Kariim-Suuratu Ar-Ruum, fuula-135

Date Created

September 11, 2020

Author

admin